

四庫全書

子部

欽定四庫全書

冊府元龜卷三百八十六 宋 王欽若等撰

將帥部

褒異第十二

梁趙犂唐僖宗時為陳州刺史賊巢驍將孟楷擁徒入
項縣犂引兵擊之賊眾大潰生擒孟楷中和三年朝廷
聞其功就加檢校兵部尚書俄轉右僕射不數月加司
空進封潁川縣伯巢黨復與蔡州秦宗權合勢以攻宛

立犇祈師於太祖太祖引大軍會於陳之西北陳人急
攻巢寨重圍遂解獻捷于行在五年八月除犇為蔡州
節度使于時巢黨雖敗宗權益熾唯陳去蔡百餘里兵
少力微日與爭戰及巢黨敗宗權誅文德元年蔡州平
朝廷議勲以犇檢校司徒克泰寧軍節度使又改授浙
江節度使兼領二鎮昭宗龍紀元年三月又以平巢蔡
功就加平章事充忠武軍節度使仍以陳州為理所
趙昶者犇之仲弟也昭宗時為忠武軍節度使亦以陳

州為理所時秦宗權未滅昶每選精銳深入蔡賊雖衆終不能抗以至宗權敗焉朝廷賞勲加檢校司徒

趙珣者犍之季弟也犍為陳州刺史以珣為親從都知兵馬使時巢黨東出商鄧與蔡賊會衆至百餘萬攻陳陳人大懼珣與二兄堅心誓衆約以死節會太祖率大軍解其圍朝廷議功加檢校右僕射遙領處州刺史

羅紹威為魏博節度使唐昭宗天祐三年詔許本道立三代私廟至太祖開平元年十月帝以紹威近年以來

貢輸極頻且倍於諸道帝慮其殫於事力以及於民遂
勞而止之賜以南越所貢珍珠枕龍腦帶後紹威疾革
遣使上章祈骸太祖撫案動容顧使者曰亟行語而主
為我強飯如有不可諱當世世貴爾子孫以相報也仍
命其子周翰監總軍府及訃至輟朝三日冊贈尚書令
羅周翰紹威子也紹威薨復為魏博節度使太祖乾化
二年帝北巡至昌樂縣周翰來見於行宮宣至內殿對
仍於御前賜食數刻乃退及辭歸鎮詔以良馬玉帶金

銀器及香藥賜而遣之

王罕之為河陽節度唐昭宗乾寧二年李克用為邠州
行營四面都統克用表罕之為副及誅王行瑜罕之以
功授檢校太尉食二千戶

馮行襲唐僖宗時為金州防禦使時興元楊守亮將襲
京師道出金商行襲逆擊大破之詔升金州為節鎮以
戎昭軍為額即以行襲為節度使

龐師古為太祖偏將援陳破蔡累有戰功遂用為都指

揮使唐昭宗乾寧四年正月復統諸軍伐鄆拔之擒其帥朱瑄以獻始表為天平軍節度留後尋授徐州節度使檢校司徒

張存敬為諸軍都虞候唐昭宗天順二年佐霍存董大軍收宿州以功奏加檢校兵部尚書太祖東征徐兗存敬屢有俘斬之功凡授指顧皆與機會矢石所及必以身先太祖尤加優異為行營都指揮使檢校右僕射天復元年春太祖以河中節度使王珂與太原結親憑恃

驕恣命存敬統大軍討之即日收絳州生擒刺史陶建
劉洎至晉州刺史張漢瑜來降二郡平進軍攻河中王
珂請降太祖嘉之乃以存敬權知護國軍留後未幾檢
校司空宋州刺史未之任卒於河中太祖痛惜開平初
追贈太保

葛從周唐僖宗時為大校從太祖破魏軍又晉人圍張
全義於河陽從周赴援大破晉軍解河陽之圍以功
表授檢校工部尚書從朱珍討徐州拔豐縣敗時溥加

檢校刑部尚書昭宗大順二年八月與龐師古同攻交
州朱瑾乾寧二年十月擒其部將孫漢筠累立戰功自
懷州刺史歷曹宿二州刺史遷檢校右僕射三年五月
從周擊并師殺戮殆盡與龐師古渡河擊鄆四年正月
下之乘勝伐兗其將朱懷英以城來降以功授兗州留
後檢校司空光化元年四月又大破并師大軍以從周
兼領邢州留後二年春幽州劉仁恭寇魏州從周擊走
之授宣義軍司馬三年八月從太祖破并人表授檢校

太保兼徐州兩使留後尋為兗州節度使天復元年青州劉鄩陷兗州太祖命討之十一月鄩舉城降以功檢校太傅末帝即位制授潞州節度使令坐食其俸加開府儀同三司檢校太師兼侍中封陳留郡王累食邑至七千戶命近臣旌節就別墅賜之貞明初卒於家冊贈

太尉

謝彥章事太祖為騎將末帝嗣位用為兩軍馬軍都軍使累與晉軍接戰有功尋領河陽節度使

張歸霸自太祖鎮宣武補劇職僖宗光啟二年與蔡賊
秦宗權將張邛較勝為飛戈所中即拔馬却逸控弦一
發賊洞頸而墜遂兼騎而還太祖時於高丘下瞰備見
其狀面加賞激厚以金帛及所獲馬錫之又常被命發
伏兵掩殺千餘人奪馬數十匹尋奏授檢校左散騎常
侍文德初與徐懷玉領兵大敗蔡賊太祖召至賞之曰
昔耿弇不俟光武擊張步言不以賊遺君父弇之功爾
其二馬昭宗大順中與燕人戰於內黃殺劉仁恭兵三

萬餘衆戎績超特居衆將之右累官至檢校右僕射光
化二年權知邢州事明年春李嗣昭以蕃漢五萬來寇
歸霸堅壁設備晉軍不敢顧其城遂移攻洛州陷焉時
太祖在滑頗慮邢之失守及葛從周復洛水嗣昭北遁
歸霸出兵襲之殺二萬餘衆捷至賞賜殊等旋以功奏
加檢校司空光化初遷萊州刺史秩滿授左衛上將軍
又除曹州刺史其秋加檢校司徒副劉知俊禦邠鳳之
寇敗之太祖受禪拜右龍虎統軍改左騎衛上將軍充

河陽諸軍都指揮使明年夏六月就除河陽節度使檢校太保尋加同平章事七月卒於位詔贈太尉

張歸厚歸霸之弟也太祖署為軍校唐僖宗光啓三年夏蔡將張晁以數萬衆屯于赤堙歸厚常與晁單騎鬪于陣晁不能支而奔師徒乘此大捷太祖大悅立署為騎軍長仍以鞍馬器幣錫之昭宗龍紀初奏遷檢校工部尚書大順二年與葛從周禦晉軍於洹水殊績尤著詔加檢校右僕射其後討滄州復洛州咸以功聞太祖

錄其勲命權知洺州事昭宗遷都雒陽除右神武統軍
天祐二年改左羽林統軍與徐懷玉同守澤州拒退并
軍乃還太祖受禪加檢校司徒開平二年夏劉知俊以
同州叛歸厚副楊師厚劉鄩等討平之秋軍還授亳州
團練使乾化元年拜鎮國軍節度使明年以疾卒詔贈
太保

張歸弁為太祖牙校唐昭宗乾寧中以偏師佐葛從周
禦并軍于洹水光啓中又佐張存敬與燕人戰于內黃

積前後功表授檢校工部尚書大順初為齊州刺史明年春青寇大舉來伐時州兵既寡罄發私帑賞給士伍青人遂遁青州平超加檢校右僕射遙領愛州刺史從征荆襄迴轉檢校左僕射天祐三年春太祖入魏誅牙軍歸并攻討封境悉平而歸并于高堂入賊太猛飛矢中于臆太祖嘉之命賜銀鞍勒馬一匹金帶一條夏五月命權知晉州冬十一月真拜晉州刺史加檢校司空太祖受禪改滑州長劔指揮使開平二年秋九月并軍

圍平陽詔歸弁統兵救之軍至解其圍加檢校司徒

楊師厚為徐州節度使昭宗天祐元年加諸軍行營馬步都指揮使二年八月太祖討趙凝於襄陽命師厚統前軍一戰敗趙凝翌日表師厚為山南東道節度留後即令南荊州留後趙明亦并軍上峽不浹旬并下兩鎮乃正授襄州節度使開平元年加檢校太保平章事又加檢校太傅三年三月詔入朝詔兼潞州行營都招討使以奇兵進攻劉知俊于鳳翔降賊將王建制加師厚

檢校太尉

牛存節為太祖過後都指揮使攻濮之役領軍先登遂拔其壘唐昭宗景福二年四月下徐州梟時溥存節力戰其功居多乾寧二年表授檢校工部尚書三年夏太祖東討鄆州十二月存節獨率伏軍奪其濠橋諸軍俱進四年正月陷其城尋與葛從周降下兗州加檢校右僕射天祐元年授邢州團練使時州兵纔及二百晉人知之以大軍來寇太祖在鄆存節率健壯出關并軍不

能克而去太祖召至勞慰久之厚賚金帛鞍馬加檢校
司徒四年太祖受禪除右千牛衛上將軍其秋攻潞州
以存節為行營馬步軍都排陣使開平二年二月自右
監門衛上將軍轉右龍虎統軍駐留雒下是歲王師敗
于上黨晉人乘勝進迫澤州之城將陷河南留守張全
義召存節謀遂以本軍及右龍武羽林等軍往應接上
黨之師存節引衆銜枚夜至澤州分布守禦晉軍焚營
而退郡以獲全太祖屢嘆賞之五月遷左龍虎統軍充

六軍馬步都指揮使十月授絳州刺史三年四月除鄜州留後六月劉知俊以同州叛尋授同州留後未幾加檢校太保同州節度使乾化二年加檢校太傅進封開國公三年加同平章事詔赴闕未帝召見慰勉賞賜甚厚十一月加開府儀同三司食邑一千戶授鄆州節度使四年加淮南西北面行營招討使控扼淮濱邊境安之其冬蔣殷反徐州逆命奉詔與劉鄩同討之殷棄甲而遁平徐州詔加太尉

王檀自唐僖宗中和中太祖鎮大梁檀為小將文德元
年二月討羅弘信敗魏人於內黃檀獲其將同儒邵神
劍以歸補衡山都虞候昭宗大順元年從龐師古渡淮
深入討孫儒之亂奮命擊賊未幾遷順義都將天復中
從太祖率西鎮之師圍鳳翔以迎昭宗屢立戎效遷左
踏白指揮使從攻王師範于青丘檀以偏師復密郡遂
權知軍事充本州馬步軍都指揮使表授檢校右僕射
守密州刺史郡接淮戎舊無壁壘乃築羅城居民賴之

加檢校司空開平二年六月授邢州保義軍節度使檢校司徒三年加檢校太保充潞州東面行營招討使乾化元年正月王景仁與晉人戰于栢鄉王師敗績俄而晉軍大至重圍四合太祖憂之檀密上表請駕不征而悉力枝梧竟全城壘三月以功就加檢校太傅同平章事七月加開府儀同三司檢校太尉琅邪郡王命宣徽使趙殷衡齋詔慰諭賜絹千匹銀千兩賞守禦邢州之功也庶人友珪僭位授鄧州宣化軍節度使檢校太尉

兼侍中末帝即位移授許州節度加檢校太師五年蔡州刺史王彥溫作亂檀受詔討平之加兼中書令

劉鄩以太祖開平元年授右衛上將軍充諸軍馬步都指揮使其年秋與諸將征潞州遷檢校司徒三年二月轉右威衛上將軍依前諸軍馬步都虞候五月改左龍武統軍充侍衛親軍兼馬步軍都指揮使其年夏同州劉知俊反引岐人襲據長安分兵扼河潼太祖幸陝命鄩西討即奪取潼關擒知俊弟知浣以獻遂引兵收復

長安知俊棄郡奔鳳翔太祖以鄆為佑國軍兩使留後
尋改佑國軍為永平軍以鄆為節度使檢校司徒行太
安尹金州管內觀察使是時西鄙未寧鄆練兵馬撫衆
獨當一面四年加檢校太保同平章事庶人友珪篡位
加檢校太傅末帝即位尤深倚重明年夏詔鄆歸闕授
開封尹遙領鎮南軍節度使九月徐州蔣殷叛鄆與鄆
帥牛存節率兵攻擊破之梟殷首以獻詔加檢校太尉
賀瓌唐昭宗天復中預平青州王師範以功授曹州刺

史兼先鋒都指揮使加檢校司空天祐二年與楊師厚
從太祖平荆襄授荆南兩使留後未幾徵還為行營左
廂步軍都指揮使累遷左龍虎統軍末帝貞明元年慶
州叛為李繼陟所據瓌以本官充西面行營馬步軍都
指揮使與張筠江鳳之衆三萬下寧衍二州三年秋慶
州平十二月瓌以功授滑州宣義軍節度使依前檢校
太傅加同平章事

唐懷英唐昭宗光化初太祖署為軍校天復元年冬太

祖帥師迎昭宗于鳳翔時李茂貞遣大將符道昭領兵
萬餘屯武功以拒太祖太祖命諸軍擊之以懷英為前
鋒領衆先登一鼓而大破之翌日太祖方至顧左右曰
邑名武功今首盪逆黨真武功也乃召懷英大加獎激
仍以駿馬珍器賜之二年八月岐軍屯奉天太祖令懷
英寨於岐軍之東北岐軍不勝而退昭宗還京賜迎鑿
殺勇功臣是歲淮人寇徐州太祖命懷英馳騎以救之
淮人遁去即以懷英為權知晉州刺史天祐三年冬佐

劉知俊破邠鳳之衆五萬於美原收十五餘寨乘勝引
軍攻下鄜州以功授陝州節度使太祖受禪加檢校太
保

徐懷玉唐僖宗中和末為太祖親從副將左長劔都虞
候又從破蔡賊於板橋收秦宗權八寨奏加檢校右散
騎常侍文德初同諸軍解河陽之圍復從破徐宿昭宗
乾寧中奏加檢校刑部尚書又破朱瑾於金鄉南擒宋
江以獻表授金紫光祿大夫檢校右僕射光化中授沂

州刺史項之王師範以青州叛屢出兵侵軼懷玉擊退之天復四年轉齊州防禦使加檢校司空天祐三年轉右龍虎統軍領六軍之士赴澤州晉人遂退開平元年授曹州刺史加檢校司徒明年除晉州刺史其秋晉人大至懷玉領兵破之於洪洞三年制授鄜坊節度使特進檢校太保練兵繕壁人頗安之加檢校太傅

郭言為步軍都將唐僖宗光啓中太祖東伐徐鄆言出奇決戰所向皆捷太祖錄其績以排陣斬斫之號委之

尋表為宿州刺史檢校右僕射

劉康又為太祖元從都將唐僖宗中和中從太祖連年
攻討徐鄆所向多捷尤善為營壘充諸軍壕寨使及太
祖盡下三鎮議其功奏加檢校右僕射兼領軍衛

劉捍為太祖親軍指揮使時太祖迎昭宗於岐下天復
三年正旦宋文通令客將郭奇使於太祖命捍復命昭
宗聞其至即詔見詢東兵之事仍以錦服銀鞍勒馬賜
之翌日授光祿大夫檢校司空登州刺史昭宗還京改

常州刺史賜號迎鑾毅勇功臣太祖受禪授左龍虎統
軍兼元從親軍馬步都虞候及上黨纏兵以捍為禦營
使蕃戎逼澤州命捍以兵千人赴之并軍遂遁車駕還
京授捍侍衛親軍都指揮使晉人侵晉州從幸陝迴加
檢校太尉

氏叔琮為太祖後院馬軍都將時東伐徐鄆多歷年所
叔琮身當矢石奮不顧命累遷為指揮使尋奏授宿州
刺史檢校右僕射遷曹州刺史昭宗天福元年領大軍

攻拔澤潞叔琮遂引兵北掠太原師還除晉州節度使
明年太祖屯軍于歧下晉軍潛襲絳州前軍不利晉軍
恃勝而攻臨汾叔琮嚴設備禦晉軍遂退據蒲縣時太
祖遣朱友寧將數萬副應悉委叔琮節制叔琮因夜出
潛師截其歸路遇晉軍遊騎盡殺之遂拔其壘太祖聞
之喜謂左右曰殺蕃賊破太原非氏老不可叔琮乃長
驅收汾州與晉人轉戰直抵并壘軍迴以其功奏加檢
校司徒

朱汝恭為汝州刺史檢校司空唐昭宗乾化初淮夷侵鄂渚武昌軍杜洪來乞師太祖遣友恭將兵應援俘斬萬計以功為潁州刺史加檢校司徒

王重師僖宗文德中為太祖帳下都指揮使檢校右僕射枕戈擐甲五六年於齊魯間凡經百餘戰威震敵人尋檢校司空後知平盧軍留後加檢校司徒其後北伐幽滄鎮定屢與晉軍接戰頗得士心故多勝捷昭宗天祐中授雍州節度加同平章事

黃文靖為諸軍指揮使從太祖南平巢蔡北定交鄆皆有功唐昭宗光化初晉將李嗣昭周德威寇於山東文靖佐葛從周統大軍禦之尋以功表授檢校右僕射耀州刺史天祐二年春命佐楊師厚深入淮甸赴壽春侵廬江軍至大獨山遇淮夷殺五千餘衆振旅而還改蔡州刺史檢校司空

胡規唐昭宗天祐四年為諸軍濠寨使太祖受禪除右羽林軍尋從劉鄩統兵收潼關擒劉知浣獻之乃以為

右龍虎統軍兼侍衛指揮使

李讜為左德勝騎軍都將從太祖討蔡賊頗有軍功及東伐交鄆以所部士伍俘獲甚衆改元從騎將表授檢校右僕射

李重胤為太祖先鋒步軍都頭及太祖大舉伐蔡賊秦宗權俾重胤以滑兵為先鋒及東討徐州下豐蕭二邑轉右廂馬步軍指揮使

范居實為感義都頭鄭州馬軍指揮使幽州劉仁恭舉

衆寇魏郡居實與葛從周張存敬率兵救魏大破幽滄之衆於內黃太祖迎昭宗於歧下以居實為河中馬軍都指揮使及唐昭宗還京賜迎鑾毅勇功臣遙領錦州刺史又遷左龍驤馬軍都指揮使從征淮南迴改登州刺史轉右神勇軍使開平元年用兵於潞州命居實統軍以解澤州之圍授耀州刺史

劉知俊唐昭宗大順中為開道指揮使從太祖討蔡賊秦宗權及攻徐州皆有功尋補徐州馬步軍都指揮使

攻海州下之遂奏授刺史天復初歷典懷鄭二州從平
青州以功奏授同州節度使天祐三年冬以兵五千破
岐軍六萬於美原自是連克鄜延五州乃加檢校太傅
平章事開平二年春三月命為潞州行營招討使知俊
未至潞夾寨已陷晉人引軍方攻澤州聞知俊至乃退
尋改西路招討使六月大破岐軍於幕谷俘斬千計李
茂真僅以身免三年五月加檢校太尉兼侍中封大彭

郡王

趙德諲唐僖宗光啓中太祖為蔡州四面行營都統表
德諲為副仍領襄州節度使蔡州平以功累加官爵封
淮安王

冊府元龜卷三百八十六

欽定四庫全書

冊府元龜卷三百八十七 宋 王欽若等撰

將帥部

褒異第十三

後唐李承嗣少仕郡為右職唐僖宗中和二年從武皇
討賊閔輔為前鋒王師之攻華陰黃巢令偽客省使王
汀會軍機於黃揆承嗣擒之以獻賊平以功授汾州司
馬改榆次鎮將朱玫之亂遣承嗣率萬人援鄜州至渭

橋迎扈車駕王行瑜既殺朱玫承嗣會鄜夏之師入定
京城獲偽相裴徹鄭昌圍函送朱玫襄王首獻於行在
駕還宮賜號迎鑿功臣檢校工部尚書守嵐州刺史賜
軍錢二萬貫孟方立之襲遼州也承嗣設伏擊其歸兵
大敗之獲其將奚忠信以功授洺州刺史及張濬之加
兵於太原也時鳳翔軍營霍邑承嗣帥一軍攻之岐人
夜遁追擊至趙城合大軍攻平陽旬有三日而拔師旋
改教練使檢校司空

李存信唐昭宗大順中為蕃漢都校從武皇討李儁降
赫連鐸白義誠以功檢校左僕射從入關討王行瑜加
檢校司空領彬州刺史

李存進昭宗光化中為永安軍使鴈門以北都知兵馬
使天復初破氏叔琮前軍於洞渦三年授石州刺史莊
宗初嗣位又為步軍右都檢校司空帥出井陘授行營
馬步軍都營虞候破汴軍於栢鄉論功授汾州刺史轉
檢校司徒俄兼西南面行營招討使出師收慈州換慈

沁二州刺史二年定魏博授天雄軍巡按使十四年權
蕃漢馬步副總管從攻楊劉戰胡柳十六年以本職兼
領振武節度使時王師據德勝渡汴軍據村渡存進造
橋成人皆伏其智莊宗舉酒曰存進吾之杜預也賜寶
馬御衣進檢校太保兼魏博馬步都將與李存審固德
勝十九年汴將王瓚率衆攻北城存進機拒應之汴軍
退加檢校太傅

李漢韶初事莊宗為河東牢城指揮使會契丹侵北鄙

表令漢韶率師進討既而大破胡寇以功加檢校右僕射

李存璋昭宗光化二年為澤州刺史入為牢城使從李嗣詔討雲州叛將王暉平之改教練使檢校司空五年立莊宗夷內難頗有力焉改河東馬步都虞候兼領鹽鐵又從破汴軍於夾城轉檢校司徒栢鄉之役為三鎮排陣使十二年從盟朱友謙於猗氏授汾州刺史汴將尹皓攻慈州逆戰敗之十三年王檀逼太原存璋率汾

之軍入城固守授大同軍防禦使應蔚朔等州都知兵馬使秋契丹逼雲州存璋拒守敵退以功檢校太傅大同軍節度雲應等州觀察使十九年四月以疾卒於雲州同光初追贈太尉平章事

李存賢以天祐五年權知蔚州以禦吐渾六年權沁州刺史先是州當賊境不能保守存賢至郡乃移復舊郡莊宗嘉之轉檢校司空真拜刺史九年汴人乘其無備來攻其城存賢擊退之十一年授武州刺史山北團練

使十二年移慈州刺史七月汴將尹皓攻州城存賢督
軍拒戰遁去十八年河中朱友謙來求援命存賢率師
赴之十九年汴將段凝軍五萬營臨晉存賢拒退之以
功加檢校司徒同光二年為盧龍軍節度使卒詔贈太
傅

康君立自武皇為鴈門節度立為右都押衙僖宗時從
武皇入關逐黃孽收長安武皇還鎮太原授先鋒軍使
文德初李罕之既失河陽來歸於武皇且求援焉乃以

君立充南面招討使為汾州刺史及潞州小校安居受
反武皇遣君立討平之授檢校左僕射昭義節度使自
是武皇之師連歲掠地於邢洺攻益方立君立常率澤
潞之師以為犄角加檢校司徒食邑千戶李存孝據邢
州叛武皇命君立討之以功加檢校太保

薛志勤自武皇鎮鴈門領代北軍使從入關收京城以
功檢校工部尚書河東右都押衙先鋒右軍使從武皇
救陳許平黃巢武皇遇難於上源驛志勤擊敗汴軍昭

宗大順初與李承嗣敗韓建之軍於蒙坑進收晉絳以
功授沂州刺史又從討鎮州牧天長臨城志勤皆先登
陷陣王暉據雲州叛討平之以志勤為大同軍節度檢
校司空

史儼為武皇帳中親將昭宗乾寧中從討王行瑜時京
城大擾士庶奔迸儼分騎警衛駕比還京盜賊不作以
功檢校右散騎常侍屯於三橋者累月昭宗寵錫優異
史建瑋昭宗光化中典昭德軍與李嗣昭攻汾州率先

登城擒叛將李瑋以獻授檢校工部尚書李思安之圍
上黨也建瑋為前鋒與總管周德威赴援時汴將王景
仁營於栢鄉瑋與德威先出井陘高邑之戰汴軍有歸
志建瑋先陷其陣遂長驅追擊夜入栢鄉俘斬數千論
功加檢校左僕射十三年敗劉鄩於元城收澶州以建
瑋為刺史檢校司空外衙騎軍都尉

蓋寓自武皇鎮太原為左都押衙檢校左僕射昭宗乾
化三年寓從武皇入關討王行瑜特授檢校太保開國

侯邑千戶

周德威昭宗乾寧中為鐵林軍使從武皇討王行瑜以
功授檢校左僕射移內衙軍副天祐三年與李嗣昭合
燕軍攻潞州降丁會以功加檢校太保代州刺史代嗣
昭為蕃漢都將李忠安之寇潞州也德威軍余吾時汴
州軍十萬築夾城圍潞州及武皇馱代莊宗再援潞州
德威大敗梁軍解潞州之圍以功加檢校太保平章事
十年又擒幽州劉守光父子授檢校侍中幽州盧龍軍

節度使

符存審初典武皇義兒軍從討邠州之勁兵屯龍泉寨存審奮力拔之師旋授檢校左僕射副李嗣昭討李瑋於汾州擒之以功改左右廂步軍都指揮使昭宗天祐三年授蕃漢馬步副指揮使與李嗣昭降丁會於上黨從周德威破賊夾城以功加檢校司徒授沂州刺史使領蕃漢馬步都指揮使七年加檢校太保充蕃漢副總管九年梁祖攻蓆縣存審赴援汴人燒營而遁以功遙

領邢洺慈團練使十三年二月劉鄩襲魏州存審戰於
故元城大敗汴人從莊宗收澶衛慈洺等州秋邢州閻
寶降授存審安國軍節度邢洺慈等州觀察使十月戴
思遠棄滄州毛璋以城降授存審檢校太傅橫海軍節
度使兼領魏博馬步軍都指揮使明年就加平章事十
九年平鎮州以功加檢校太傅兼侍中二十年正月師
旋於魏州莊宗出城迎勞就第宴樂居無何契丹犯燕
薊詔存審以本官充幽州盧龍軍節度使自鎮州之任

同光初加開府儀同三司檢校太師中書令邑千戶賜號忠烈扶天啓運功臣五月卒於幽州莊宗震悼久之廢朝三日贈尚書令

袁建豐為鐵林都虞候從武皇破邠州王行瑜以功遷左親騎軍使轉突騎指揮使從莊宗解圍上黨破栢鄉陣累功加右僕射左廂馬軍使明宗為內衙指揮使建豐為副北討劉守光常身先士卒轉都教練使權蕃漢副總管莊宗入鄴以心腹幹能選為魏府都巡檢使破

劉鄩下衛慈洛三郡有功加檢校司空

夏魯奇為慈州刺史中都之戰汴人大敗魯奇擒王彥章以獻莊宗壯之賞絹千匹梁平授鄭州防禦使

元行欽為武寧軍節度使檢校太傅莊宗賜名紹榮常內宴羣臣使相預會行欽官為保傅合地褥而坐酒酣樂作帝叙平生戰陣之事因左右顧視曰紹榮安在所司奏云有勅使相預會紹榮散官殿上無位帝徹會不憚翌日以行欽為同平章事繇是不宴百官於內殿但

宴武臣而已

李建及為遼州刺史莊宗胡柳之役欲收軍建及引銀
鎬效節奮擊繇是王師復振以功檢校司空魏博內外
衙都將又與汴將王瓚戰於戚城建及傷手莊宗解御
衣金帶賜之

張敬達為廳直軍使從莊宗平河南有功加檢校工部
尚書

康思立為河東親騎軍使從莊宗解上黨圍敗梁人於

栢鄉及平薊丘後戰於河上皆有功累加檢校戶部尚書右突騎指揮使莊宗即位繼改軍帥賜忠勇拱衛功臣加檢校尚書左僕射

康延孝為捧日軍兼南面招討指揮使檢校司徒莊宗平汴延孝頗有力焉以功加檢校太保

安元信為突陣軍都將時莊宗嗣晉王位元信從救上黨破夾寨復澤潞以功授檢校司空遼州刺史賜玉鞍名馬栢鄉之役日晚戰酣元信重傷莊宗自臨傅藥改

檢校司徒武州刺史充內衙副都指揮使山北諸州都團練副使

安金全武皇時為騎將屢從征伐莊宗之救潞州及平河朔皆有戰功累遷刺史

閻寶莊宗時遙領天平軍節度使東西面招討等使張文禮之殺王鎔也寶帥師進討及契丹來援鎮州前鋒至新樂衆心憂之寶見莊宗指陳方畧軍情乃安敵退加檢校侍中

李紹文莊宗時為博州刺史預破劉鄩於故元城歷貝
隰二州刺史領天雄軍馬步副都將屯於德勝從閻寶
討張文禮為馬步都虞候明宗收鄆州以紹文為右都
押衙馬步軍都將從破王彥章於中都同光中歷徐滑
二鎮副使知府事

霍彥威為陝州留後從明宗平潞州授徐州節度使天
成初改平盧軍節度至鎮擒王公儼斬之明年冬肆覲
於汴明宗接遇甚厚累遷至檢校太尉兼中書令

王晏球為齊州防禦使北面行營馬軍都指揮使鄴都之亂明宗入赴內難晏球時在瓦橋遣人招之明宗至汴晏球率騎軍從至京師以平定功授宋州節度使天成二年王都據定州叛晏球討平之以功授天平軍節度使未幾移鎮青州就加兼中書令

安審通明宗天成初為齊州防禦使兼諸道先鋒馬軍都指揮使奉詔北征會龍脰部下兵亂審通盡戮之以功檢校太傅滄州節度使

劉彥琮為鐵林指揮使從明宗赴難京師授華州留後
尋正授節旄

西方鄴為奉義指揮使天成初荆渚違命明宗素知其
才力擢授夔州刺史東南面行營招討副使鄴將偏師
收復峽內三州二年昇夔州為寧江軍以鄴為節度使
屢奏克捷三年加檢校太保

孫璋天成初為齊州防禦使王都之據中山璋為定州
行營都虞候賊平加檢校太保

張虔釗為親軍都指揮使領春州刺史明宗天成中虔釗與諸將圍王都於中山大敗契丹於嘉山之下及定州平以功授滄州節度使

晉房知溫初仕後唐明宗天成初為兗州節度使明年詔充北面招討使屯於盧臺軍以盧文進來歸特加進同平章事賞招討之功也至長興二年除平盧軍節度使累官至開府儀同三司檢校太師兼中書令封東平王食邑五千戶食實封三百戶高祖天福元年十二月

卒於鎮贈太尉詔立神道碑

康福初仕後唐明宗為朔方河西等軍節度到鎮歲餘
西戎皆款附改賜福耀忠扶定保節功臣末帝清泰中
加特進開國侯充西面都部署高祖受命就加檢校太
尉封開國公

華溫琪仕後唐為秦州節度使明宗即位因入朝願留
闕下明宗嘉而許之除左驍衛上將軍逐月別賜錢粟
以豐其家後為太子少保致仕高祖天福元年十二月

終於家詔贈太子太保

方太為奉國都虞候從杜重威破張從賓於汜水高祖以其功除趙州刺史

郭金海為護聖都虞候高祖天福二年金海從王師討范延光於魏州以功轉本軍都指揮使

王建立為青州節度使高祖天福二年封臨淄王明年封東平王五年入覲高祖賜不拜呼老兄使肩輿入朝上殿則使人扶導論者榮之尋表乞休致帝不許乃除

潞州節度使割遼沁為上黨屬郡加檢校太師進封韓
王以光其故里高祖御明德樓餞送赴鎮賜玉斧蜀馬
及卒冊贈尚書令

馬全節高祖天福五年鎮安州時李金全據州叛引淮
軍為援因命全節將兵討平之以功加檢校太尉六年
授鎮州行營副招討使兼排陣使與安重榮戰於宗城
大敗之鎮州平加開府儀同三司

程福贊初為軍校天福七年冬從杜重威討鎮州與安

重榮大戰於宗城以功遷雒州團練使檢校太尉

皇甫遇高祖天福末鎮河陽少帝即位歸闕及北騎南寇
從至漕州戰於鄆州北津敵衆大敗溺死數千人以功
拜滑州節度使

郭璘少帝開運中鎮易州時契丹攻其郡以州兵擊賊
數獲其利朝廷嘉之就加檢校太保

漢王周初仕後唐明宗為裨校累歷郡守晉天福中安
重榮以鎮州叛從杜重威討平之以功授貝州節度使

高祖定天下移鎮徐州加同平章事乾祐元年二月卒
於鎮輟視朝三日贈中書令

劉在明後唐明宗時為奉聖左廂都指揮使領和州刺
史從幸汴州至滎陽聞朱守殷叛用為前鋒至汴城率
先登城賊平授汴州馬步軍都指揮使晉高祖天福中
李金全以安州叛在明從李守貞攻之大破淮賊以功
授安州防禦使移領絳州楊光遠據青州叛召為行營
馬步軍都指揮使領齊州防禦使青州平遷相州留後

及高祖踐阼授幽州道行營都部署時蕃將守中山在明
出師經略敵乃棄城而去遂授鎮州留後乾祐元年五
月二日授鎮州節度使六月卒於鎮贈侍中

史宏肇為許州節度使侍衛步軍都指揮使時高祖由
蒲陝赴潞宏肇為前鋒兵士所至秋毫不犯以至平定
兩京及從駕征鄴迴加同平章事充侍衛親軍都指揮
使兼鎮宋

杜重威晉天福初典禁軍遷授舒州刺史二年張從賓

構亂據汜水晉高祖遣重威與侯益率衆破之以功授
潞州節度使與楊光遠降范延光於鄴城改許州節度
使兼侍衛親軍馬步軍副都指揮使尋加同平章事

周高季興梁太祖時為荆南節度使開平中破雷彥恭
於朗州加平章事

安叔千初仕後唐莊宗為奉安都將天成初王師伐定
州命為先鋒都指揮使王都平授秦州刺史連刺涿易
二郡清泰初契丹寇振門叔千從晉祖逆戰敗之進位

檢校太保振武節度使晉祖踐阼就加同平章事

王商後唐天成中為靈武都指揮使久之代還清泰中張令昭據鄴叛商從范延光討之首冒矢石率先登城以功授祁州刺史

何福進後唐清泰中自彰聖都虞候率本軍從范延光平鄴以功歷鄭隴二州防禦使

安審暉晉高祖時為河陽節度使會李金全據安州叛詔馬全節為都部署領兵討之以審暉為副安陸平移

鎮鄧州進位檢校太傅又襄州安從進叛舉漢南之衆
北攻南陽審暉登城召賊帥以讓之從進不克而退襄
州平就加檢校太尉

宋彥筠初仕晉為防禦使從高行周破安從進於襄陽
以功拜鄧州節度使

王饒仕晉高祖為奉國軍檢校尚書左僕射天福六年
從杜重威平常山以功加檢校司空遷本軍都校領連
州刺史時安從進叛于襄陽高祖以饒為行營步軍都

指揮使賊平授涼州刺史復為本軍右廂都指揮使領
閬州團練使及漢祖舉義於晉陽尋討復諸夏唯常山
卽為蕃將所據時饒在其卽乃與李筠白再圖之策承間
盡逐其黨漢祖嘉之授鄜州觀察使後加光祿大夫賜
爵齒侯

高從誨為荆南節度使晉天福中加守中書令時襄州
安從進反王師攻討從誨起戰棹饋軍食以助焉詔書
褒美尋加守尚書令

劉詞仕晉為奉國第一都虞候從馬全節伐安陸敗淮賊萬餘衆晉祖嘉之授奉國都校累加檢校司空又從杜重威敗安重榮於宗城又破鎮陽詞自登雲梯身先士伍以功加檢校司徒沁州刺史又仕漢為奉國右廂都校遙領閬州防禦使從漢祖平鄴加檢校太保乾祐初李守貞叛於河中太祖征之朝廷以詞為侍衛步軍都指揮遙領寧江軍節度使充行營馬步都虞候命分屯於河西二年正月李守貞遣敢死之士數十夜入其

營詞叱短兵以擊之賊衆大敗而退河中平太祖嘉其
功表為華州節度使歲餘移鎮滑臺太祖受命加同平
章事

王令溫晉初為洺州團練使及安重榮稱兵於鎮州晉
祖以令溫為營馬軍都指揮使與都帥杜重威敗賊於
宗城以功授亳州防禦使

李建崇仕晉為申州刺史天福七年冬襄州安從進構
逆建崇拒賊至湖陽縣之花山接戰大敗之以功授亳

州團練使襄陽平遷安州防禦使

王重胤為禁軍指揮使晉天福中鎮州安重榮謀叛請分杜重威麾下兵擊敗之以功遷護聖右廂都指揮使漢初仍典禁軍從征鄴都為先鋒都校鄴都平遷深州刺史

趙暉仕漢祖乾祐初鎮鳳翔屬王景崇叛據岐山命暉為西南面行營都部署以討明年春拔之加檢校太師兼侍中國初就加兼中書令

曹英仕漢為奉國軍主檢校司徒假康州刺史乾祐初
李守貞據河中叛授行營步軍都校河中平遷本軍廂
主領岳州防禦使隨太祖在魏為北面行營步軍都校
從平內難國初以翊戴功授招武軍節度使檢校太傅
侍衛步軍都指揮使

史彥超為龍捷指揮使太祖之赴內難彥超以本軍從
國初與虎捷都指揮使何徽戍晉州會劉崇與契丹入
寇攻圍州城月餘彥超與何徽叶力固拒累挫賊鋒太

祖嘉其善守之功賞賜甚厚未幾授龍捷右廂都指揮使尋授鄭州防禦使劉崇之寇潞州也車駕親征以彥超為先鋒都指揮使高平之戰先登陷陣以功授華州節度使先鋒如故

高行周初隸後唐明宗帳下時明宗為總管襲鄆州行周為前軍夜涉河入東城比曙平之及莊宗平河南累加檢校太保領端州刺史明宗即位行周從王景球圍定州敗王都擒禿餒皆有功賊平遷潁州團練使晉末

為鄆州節度使漢高祖入汴加守太傅兼中書令代李
守貞為天平軍節度使杜重威據鄆叛漢高祖以行周
為招討使總兵討之鄆平遷鄆都留守加守太尉進爵
臨清王乾祐中入覲加守太保進封鄆王復授天平軍
節鉞改封齊王太祖踐阼加尚書令增食邑至一萬七
千戶太祖以行周耆年宿將賜詔不名但呼王位而已
廣順二年秋薨贈賻加等冊贈尚書令追封秦王

安審琦仕晉少帝為襄州節度使兼中書令屬荆人叛

命潛遣舟師數千將屠襄郢審琦禦之而遁朝廷賞功
就加守太保進封齊國公歲餘又加守太傅國初封南
陽郡顯德初進封陳王世宗嗣位加守太尉三年拜童
請覲優詔許之加守太師增食邑至一萬五百戶食實
封三千三百戶

唐景思世宗時董效順指揮屯於淮上世宗親征淮南
景思繼有戰功乃命遙領饒州刺史

白延遇仕晉歷典禁軍累遷至檢校司空天福中晉祖

在鄴安重榮叛於鎮州帥衆數萬指闕而來晉祖命杜重威統諸將以禦之時延遇不預其行乃泣告晉祖願以身先許之及陣於宗城延遇帥其屬先犯之斬級數千晉祖聞之即命中使以寶劍良馬賜之常山平以功加檢校司徒充馬軍右廂都校後遷復州防禦使國初加檢校太保尋受代歸闕屬太祖親征兗海以延遇為先鋒都校兗州平授齊州防禦使及世宗征淮南乃詔延遇為先鋒都校與韓令坤先入揚州尋以別部屯於

盛塘前後敗淮賊萬餘衆及世宗迴自壽陽制以延遇
為同州節度使未之任所以疾卒於濠州下詔贈太尉

冊府元龜卷三百八十七

欽定四庫全書

冊府元龜卷三百八十八

宋 王欽若等 撰

將帥部

儒學 有禮

儒學

周官太宰九兩之法其四曰儒以道得民蓋六藝之文
七德之要盡在是矣繇三代而下善為將者又豈勝道
哉乃有博通經術涉獵史傳雖在軍旅不廢俎豆將臨

戰陣未忘講誦緩帶以談論下帷而著述亦有起於諸生常歷科舉為世文宗後執兵柄至乃屬辭削牘賦詩應詔書檄翩翩之美文彬彬之譽皆所以揚閭外之風烈昭義府之不訓者已

晉文公蒐于被廬作三軍謀元帥趙衰曰郤穀可臣亟聞其言矣說禮樂而敦詩書詩書義之府也禮樂德之則也德義利之本也夏書曰敷納以言明試以功車服以庸君其試之乃使將中軍

漢陳湯少好書博達善屬文以薦為郎遷西域副校尉
與甘延壽俱出累遷射聲校尉

馮奉世以良家子選為郎年三十餘乃學春秋涉大義
讀兵法前將軍韓增奏以為軍司空令本始中從軍擊
匈奴軍罷復為郎累遷右將軍光祿勳居爪牙官前後
十年為折衝宿將功名次趙充國

後漢耿況王莽時以明經為朔調連率

莽改上谷郡曰朔調守曰連率

光武徇河北加況大將軍

沈子弇少習父業學詩禮亦為大將軍

弇弟子秉博通書記歷征西度遼將軍

景丹少學長安王莽時舉四科丹以言語為固德侯相

有幹事稱遷朔調連率副貳屬令也光武徇河北拜丹偏

將軍累遷驃騎大將軍

鄧禹年十三能誦詩受業長安光武徇河北號禹曰鄧

將軍累遷前將軍右將軍

馮異好讀書通左氏春秋孫子兵法光武徇河北以為

偏將軍進止皆有表識

進退有常處也

累遷征虜將軍

賈復少好學習尚書事舞陰李生後從光武立功累遷
執金吾建武十三年復知帝欲偃干戈脩文德不欲功
臣擁衆京師乃與高密侯鄧禹剽甲兵敦儒學帝深然
之遂罷左右將軍復以列侯就第加位特進

朱祐為人質直尚儒學初學長安光武侯之祐不時相
勞苦而先升講舍後為大將軍

祭遵為征虜將軍取士皆用儒術對酒設樂必雅歌投

壺又建為孔子立後奏置五經大夫雖在軍旅不忘俎豆

賈宗為長水校尉宗無通儒術每讌見常使與少府丁鴻等論議於前

馬援嘗受齊詩師事潁川滿昌後為虎賁中郎將援閑於進對尤善述前世行事每言及三輔長者下至閭里少年皆可觀聽

竇固好覽書傳喜兵法累遷奉車都尉出玉門擊西域

鮑永少有志操習歐陽尚書後拜僕射行將軍事將兵
集河東永好文德雖行將軍常衣皂檐榆路稱鮑尚書
兵馬

班超持公羊春秋多窺覽後為西域都護

皇甫規為中郎將持節監關西兵討零吾等破之歷度
遼將軍護羌校尉所著賦銘碑贊禱文弔疏章表教令
書檄牋記凡二十七篇

張真少遊三輔師事太尉朱寵學歐陽尚書後為使臣

奴中郎將時休屠各及朔方烏桓同反叛燒度遼將軍
門引屯赤陁烟火相望兵衆大恐各欲亡去真安坐帳
中與弟子講誦自若軍士稍安乃潛誘烏桓陰與和通
遂使斬休屠各渠帥襲破其衆諸胡悉降真著尚書記
難三十餘萬言人著銘頌書教誡述志對策章表二十
四篇

公孫項從涿郡盧植學於緱氏山中略見書傳後為奮
武將軍遼東太守

郭涼雖為武將然通書經多智畧尤曉邊事

魏鮑信漢末以兵應太祖表信行破虜將軍雖遭亂起
兵家本脩儒

夏侯惇年十四就師學後為大將軍雖在軍旅親迎師
受業

李典好學問貴儒雅不與諸將爭功敬賢士大夫恂恂
若不及軍中稱其長者

鍾會好書籍涉歷衆書特好者易精練名理以夜續晝

後為鎮西將軍假節都督關中諸軍事統十萬餘衆伐蜀

蜀諸葛亮為右將軍行丞相事亮言教書奏多可觀隨類相從凡為二十四篇

關侯好左氏傳諷誦畧皆上口後為前將軍假節鉞

張翼治律春秋游學京師後為前領軍督建威假節征西將軍

吳張昭少好學從白侯子安受左氏春秋博覽衆書後

為輔吳將軍在里宅無事乃著春秋左氏傳解及論語
註大帝問衛尉嚴峻寧念小時所聞書不峻因誦孝經
仲尼居昭曰嚴峻鄙生臣請為陛下誦之乃誦君子之
事上咸以昭為知所誦

魯肅為偏將軍轉橫江將軍雖在軍陣手不釋卷又善
談論能屬文辭思度弘遠有過人之明

士燮為衛將軍領交趾太守耽玩春秋為之注解陳國
袁徽與尚書令荀彧書曰交趾士府君既學問優博又

達於從政處大亂之中保全一郡二十餘年疆場無事
民不失業羈旅之徒皆蒙其慶雖竇融保河西曷以加
之官事小閥輒玩習書傳春秋左氏傳尤簡練精微吾
數以咨問傳中諸疑皆有師說意思甚密又尚書兼通
古今大義詳備聞京師古今之學是非忿爭今欲條左
氏尚書長義上之其見稱如此

陸凱為建武都尉領兵雖統軍衆手不釋書好太玄論
演其意以筮輒驗

孫瑜為奮威將領丹陽太守濟陰人馬普篤學好古瑜厚禮之使二府將吏子弟數百人就受業遂立學宮臨饗講肄是時諸將皆以軍務為事而瑜好樂墳典雖在戎旅誦聲不絕

孫奭為揚威將軍領江夏太守奭亦愛樂儒生復命部曲子弟就業後仕進朝廷者數十人

陸績為鬱林太守加偏將軍給兵二千人績既有覽疾又意在儒雅非其志也雖有軍事著述不廢

陸景為偏將軍中夏督梁身好學著數千篇

晉王沈好書善屬文魏末為征虜將軍都督江北諸軍事晉受禪遷驃騎將軍錄尚書事

羊祜為征南大將軍博學能屬文所著文章及為老子傳並行於世

杜預博學多通明於興廢之道常言德不可以企及立功立言可庶幾也後拜鎮南大將軍預身不跨馬射不穿札而每在大事輒居將帥之列結交接物恭而有禮

既立功之後從容無事乃耽思經籍為左氏春秋經傳
集解又參考衆家譜第謂之釋例又作盟會圖春秋長
歷成一家之學

周處勵志好學有文思後為新平太守累遷御史中丞
氏人齊萬年叛乃使處隸夏侯駿西征萬年聞之曰周
府君昔臨新平我知其為人才兼文武若專斷而來不
可當也如受制於人此成擒耳

劉琨初為司隸從事時征虜將軍石崇引致賓客日以

賦詩琨預其間文詠頗為當時所許後為都督并冀幽
三州諸軍事

祖逖博覽書記該涉古今往來京師見者謂逖有贊世
才其後為鎮西將軍石勒不敢窺兵河西

邵續博覽經史善談理義妙解天文後為平北將軍假
節

陶侃為都督荆雍益梁州諸軍事遠近書疏莫不手答
詞翰如流未嘗壅滯

郗鑒博覽經籍躬耕隴畝吟詠不倦以儒雅著名不應
州命後為安西將軍都督揚州江西諸軍事假節鎮合
肥

劉毅為衛將軍往征盧循敗歸後宋高祖與安帝大宴
於西池有詔賦詩毅詩云六國多雄士正始出風流毅
自以武功不競故示文雅有餘也

宋謝晦為高祖太尉參軍晦涉獵文義朗瞻多通高祖
深加愛賞後為都督荆湖雍益寧南北秦七州諸軍事

領南蠻校尉荊州刺史

劉湛為高祖相國參軍博諳前世舊典後為右衛將軍
出督廣交二州諸軍事

朱齡石為高祖鎮軍參軍時太尉主簿劉穆之嘗於高
祖坐與齡石答書自旦至日中穆之得百函齡石得八
十函高祖北伐遷左將軍持節督關中諸軍事

南齊柳世隆授後將軍尚書左僕射不拜世隆性愛涉
獵啓太祖借秘閣書帝給三千卷

梁楊公則為左將軍歷中護軍性好學雖居軍旅手不輟卷士大夫以此稱之

羊侃為北伐大將軍司馬高祖制武宴詩三十韻以示侃侃即席應詔高祖覽曰吾聞仁者有勇今見勇者有仁可謂鄒魯遺風英賢不絕

韋叡為護軍將軍其第三子稜尤明經史世稱其洽聞叡每坐稜使說書其所發摘稜猶弗之逮

柳惔為安南將軍著仁政傳及諸詩賦粗有辭義

曹景宗為右衛將軍破魏軍振旅凱入帝於華光宴飲
連旬令左僕射沈約賦韻景宗不得韻意色不平啓求
賦詩帝曰卿伎能甚多人才英拔何必止在一詩景宗
已醉求作不已詔令約賦韻詩韻已盡唯餘競病二字
景仁便操筆斯須而成其辭曰去時兒女悲歸來笳鼓
競借問大將軍何如霍去病帝歎不已約及朝賢驚嗟
竟曰詔令上左史

張欣泰將家子不以武業自居好隸書讀子史仕齊為

直閣將軍後為步兵校尉

後魏賀狄干世為將孝文時遣狄干結婚於姚萇後狄干還在長安幽閒因習讀書史通論語尚書諸經舉止風流有似儒者

刁雍為征南大將軍性寬柔好尚文典手不釋書明敏多智凡所為詩賦頌論并詩雜文百有餘篇

鄴輝為征虜將軍所作文章頗行於世撰慕容氏書不成

劉藻為征虜將軍涉獵羣籍美談笑善與人交

崔孝芬為車騎大將軍博文口辨善談論所有文筆數十篇

李元護初仕南齊龍驤將軍雖以將用自達然亦頗覽文史習於簡牘

賀拔勝為驃騎大將軍始愛墳籍乃招引文儒討論義理性又通率重義輕財身死之日唯有隨身兵仗及書千餘卷

後周陸逞起家羽林監文帝內親信時輩皆以驍勇自達唯逞獨兼文雅帝由此加禮遇焉

韋孝寬為驃騎大將軍徐州總管雖在軍中篤意文史政事之餘每自披閱末年患眼猶令學士讀而聽之

高琳為驃騎大將軍時文州氐酋反詔琳率兵討平之師還高祖宴羣公卿士仍命賦詩言志琳詩末章云寄言寶車騎為謝霍將軍何以報天子沙漠靜妖氛帝大悅曰獯獫陸梁未時款塞卿言有驗國之福也

隋賀若弼為吳郡總管與壽州總管源雄並為重鎮弼遺雄詩曰交河驃騎幕合浦伏波營勿使麒麟上無我
二人名

崔彭為車騎驃騎將軍高祖常曰卿弓馬固已絕人頗知學否彭曰臣少愛周禮尚書每於休沐之暇不敢廢也帝曰試為我言之彭說君臣戒慎之義帝稱善觀者以為知言

周羅暉初仕陳為太子左衛率信任逾重時參宴席陳

主曰周左率武將詩每前成文士何為後也都官尚書
孔範對曰周羅暉執筆製詩還如上馬入陣不在人後
自是益見親禮

唐張士貴貞觀中為右屯衛大將軍從幸岐陽教習將
至武功太宗載誕之所也是日賜宴士貴詩甚有理致
是後頻屬和士貴音詞質樸言論不文多疑其假手

李君羨貞觀中為左武侯中郎將北門長上在仗
讀書不暫休止深蒙賞勞累遷蘭州都督左監門將軍

劉仁軌好學專習每行坐所在輒書空畫地繇是博涉
文史顯慶中為檢校帶萬州刺史統衆便道發新羅兵
救劉仁愿於百濟府城仁愿既至京高祖謂曰卿在海
東前後奏請皆合事宜而雅有文理卿武將何得然也
對曰劉仁軌之詞非臣所及也帝深歎賞之因超加仁
軌六階正授帶萬州刺史

婁師德頗有學術弱冠進士擢第累補監察御史上元
初吐蕃犯塞有詔募猛士以討之師德抗志應募高祖

大悅特假朝散大夫從軍西討頻立戰功

裴行儉補弘文生舉明經儀鳳中為秦州領撫右軍總管擒十姓可汗阿史那都支及遮旬而還高祖曰卿文武兼資今故授卿二職即日拜禮部尚書兼檢校右衛大將軍

唐休璟少以明經擢第有文武才幹久視元年為隴右諸軍州大使大破吐蕃大將趨莽支於梁州洪源谷入拜武威金吾二衛大將軍長安中西突厥烏質勒與諸

蕃不和舉兵相指安西道表奏相繼則天令休璟與宰相商度事勢俄頃草奏便遣施行後十餘日安西諸州表請兵馬應接程期一如休璟所畫

郭元振舉進士累遷隴右諸州軍大使安西大都護朔方大總管有文集二十卷

張說應詔舉開元七年權檢校并州都督府長史克天兵軍使兼脩國史仍齎史本隨軍脩撰後為朔方軍節度使

哥舒翰年四十慨然仗劍之河西事節度王倓後王忠嗣為河西節度使以翰為衙前將翰好讀左氏春秋及漢書踈財重氣士多歸之

高霞寓少讀左氏春秋及孫吳兵法後為左武衛大將軍邠寧節度使

梁劉鄩幼有大志好兵畧涉獵史傳唐中和中事青州節度使王敬武為少校

羅紹威為天雄軍節度使服膺儒術明達吏理好招延

文士聚書萬卷開學館置書樓每歌酒宴會與賓佐賦詩頗有情致江東人羅隱者佐錢鏐軍幕有詩於天下紹威遣使賂遺敘南卷之敬隱乃聚其所為詩投寄之紹威酷嗜其作因目已之所為曰偷江東集至今鄴中人士諷詠之紹威常有公讌詩曰簾前淡泊雲頭日座上蕭騷雨脚風雖深於詩者亦所嘆伏

烏振為河北道副招討畧涉書史尤嗜左氏傳好為詩善筆札凡郵亭佛寺多有留題之跡

晉史翰為義成軍節度使好春秋左氏傳每視政之暇
延學者講說躬自執卷授焉時發難問窮於隱奧流輩
或戲為史三傳

張希宗為靈武節度使初自虜南歸過故鄉謁中朝執
政及臨郡與屬邑令多為章句雖非工甚關理道有古
人之趣性嗜書莅事之餘手不釋卷

錢元瓘為兩浙節度使幼聰敏少親吏事有詩千篇編
尤者三百篇命曰錦樓集

有禮

傳曰禮信戰之器也又曰治軍非禮威嚴不行是知軍旅有禮則武功克成然後敦陣有果毅之容御衆有長幼之序知其可用能以德攻者也歷代而下賢帥繼出固有深達義府之訓能率禮經之法講求善志著於行事乃至不敢自擅以誅偏裨先問儀適然後會見甫清亂畧致恭宗祏或靡敢代主將之任或使之知朝廷之尊不伐隣喪罔踰服紀言還故郡克申禮意接下遵乎

素範治戒宣乎懿望斯皆敦閱之攸及信讓之可稱者
歟故秦師過周王孫知其必敗狂狡違命君子謂之宜
禽蓋禮之不可不慎也已

韓厥晉大夫為司馬魯成公二年六月晉伐齊齊逢丑

父為齊侯右丑父不能推車而及

為韓厥所及

厥執繫馬前

繫馬絆也執之示脩臣僕之職

再稽首奉觴加璧以進

進觴璧亦以示敬

曰寡

君使羣臣為魯衛請曰無令輿師陷入君地

本但為二國救請不

欲乃過入君地謀辭

下臣不幸屬當戎行無所逃隱

屬適也

且懼奔

辟而忝兩君臣辱戎士

奔辟則為辱晉君并為齊侯羞故言二君此蓋韓厥自處臣僕謙敬

之飾

敢告不敏攝官承乏

言欲以己不敏攝承空乏從君俱還

卻至晉大夫佐新軍魯成公十六年六月甲午晦晉侯

及楚子鄭伯戰于鄢陵卻至三遇楚子之卒見楚子必

下免胄而趨風

疾如風

楚子使工尹襄問之以弓

問遣也

曰

方事之殷也有執常之跗注君子也

執赤色跗注戎服若袴而屬於跗與

務連識見不穀而趨無乃傷乎

恐其傷

卻至見客免胄承命

曰君之外臣至從寡君之戎事以君之靈間蒙甲冑

問猶

也近介者不敢拜命介者不拜敢告不寧君命之辱以君辱賜命故不敢自安為

事之故敢肅使者

以軍事不得拜故肅使者肅手至地若令撞

三肅使者而

退

晉韓厥從鄭伯

從逐也

其御杜溷羅曰速從之其御屢顧

不在馬可及也韓厥曰不可以再辱國君乃止

二年鞏戰韓厥

已辱齊侯

卻至從鄭伯其右第翰胡曰謀輅之余從之乘而

俘以下

欲造輕兵單進以距鄭伯車前而自後登其車以執之

卻至曰傷國君有

刑亦止

士匄晉大夫帥師侵齊及穀聞喪而還禮也

子展鄭大夫魯襄公二十五年六月子展伐陳宵突陳

城遂入之子展命師無入公宮與子產親御諸門陳侯

使司馬桓子賂以宗器陳侯免擁社免喪服擁社抱社主示服也使

其衆男女別而累以待於朝累自囚係子展執紼而見

見陳侯再拜稽首承飲而進獻承飲奉觴示不夫臣敬子美入數俘

而出子美子產也但數其所獲人數不將以歸祝衹社司徒致民司馬致節

司空致地乃還衹除也節兵符陳亂故正其衆官脩其所職以安定之乃還也

漢衛青武帝時為大將軍出征匈奴右將軍蘇建盡亡

其軍獨以身得亡去自歸青青問其罪正閼長史安議

郎周霸等

正軍正也閼名也律軍都官長史一人

建當云何

謂處斷其罪法何至也

霸曰自大將軍出未嘗斬裨將今建棄軍可斬以明將

軍之威閼安曰不然兵法小敵之堅大敵之禽也

言衆寡不

敵以其堅戰無退心故士卒喪盡也一說若建恥敗而不自歸則亦被匈奴禽之而去

今建以數

千當單于數萬力戰一日餘士皆不敢有二心自歸而

斬之是示後無反意也不當斬青曰青幸得以肺附

肺附

謂親戚也

待罪行間不患無威而霸說我以明威甚失臣意

且使臣職雖當斬將以臣之尊寵而不敢自擅專誅於境外其歸天子天子自裁之於以風為人臣不敢專權不亦可乎

風讀曰諷

軍吏皆曰善遂囚建行在所

後漢鄧禹為大司徒光武遣禹引兵西入關以乘更始與赤眉之亂赤眉西走扶風禹乃南至長安軍昆明池率諸將齋戒擇吉日脩禮謁祠高廟叔十一帝神主遣使奉詣洛陽因循行園陵為置吏士奉守焉

蓋延為虎牙將軍南伐劉永與其將蘇茂戰於沛西大

破之遂定沛楚臨淮脩高祖廟置嗇夫祝宰樂人

東觀記云

延因齋戒
祠高祖廟

竇融為涼州牧時光武西征隗囂融率五郡太守及羌虜

小月氏等步騎數萬輜重五千餘兩與大將軍會高平

第一

高平原州縣高平有第一城

融先遣從事問會見儀適

猶言儀注

是

時軍旅代興諸將與三公交錯道中或背使者交私語

帝聞融先問禮甚善之以宣告百僚乃置酒高會引見

融等待以殊禮

吳凌統吳郡餘杭人為偏將軍過本縣步入寺門見長吏懷三版恭敬盡禮親舊故人恩意甚隆

晉劉弘為南蠻檢校荊州刺史時總章太樂伶人避亂多至荊州或勸可作樂者弘曰昔劉景升以禮壞樂墮命杜夔為天子合樂樂成欲庭作之夔曰為天子合樂而庭作之恐非將軍本意吾嘗為之歎息今主上蒙塵吾未能展効臣節雖有家仗猶不宜聽況御樂哉乃下

郡縣使安慰之頃朝廷旋返送還本置

桓溫為征討大都督師次伊水大敗姚襄襄奔平陽溫屯故太極殿前徙入金墉城謁先帝諸陵皆繕復之燕置陵令

劉毅初為青州刺史桓弘中兵參軍丁憂在家及義旗初興遂墨經從事桓弘平以毅為撫軍將軍軍役漸寧上表乞還京口以終喪禮曰弘道為國者理盡於仁孝許窮歸天者莫甚於喪親但臣凡庸本無感槩不能隕

越故其宜爾往年國難滔天故志竭愚忠覲然苟存去
春鑿駕迴軫而狂狡未滅雖姦凶時梟餘燼竄伏威懷
寡方文武勞弊微情未申顧影悲憤今皇威遐肅海內
清蕩臣窮毒艱穢亦已具於聖聽蕪羸患滋甚衆疾互
動如今寢頓無復人理臣之情也本不甘生語其事也
亦可以沒乞賜餘骸終其丘墳庶幾忠孝之道獲宥於
聖世不許

梁張興世為雍州刺史左衛將軍興世父仲子繇興世

致位給事中興世欲將往襄陽愛鄉里不肯去嘗謂興
世曰我雖田舍老翁樂聞鼓角汝可送一部行田時欲
吹之興世素恭謹畏法譬之曰此是天子鼓角非田舍
所吹

北齊王琳初仕後梁為廣州刺史梁元帝為魏圓逼乃
徵琳赴援除湘州刺史琳師次長沙知魏平江陵已立
梁王督乃為梁元帝舉哀三軍縞素

高季武東魏武定中除侍中尋加冀州大中正時文襄

先為此任啓以廼授為都督

隋周羅暉初為陳散騎常侍隋師南伐都督巴峽緣江諸軍事以拒隋師遇丹陽陷陳主被擒上江猶不下晉王遣陳主手書命之羅暉為諸將泣三日然後降其年秋拜儀同三司鼓吹羽儀送之於宅後陳主卒羅暉請一臨哭帝許之縗絰送至墓所葬還釋服而後入朝帝甚嘉尚世論稱其有禮

高頴為左領軍大將軍開皇二年長孫覽元景山等伐

陳頰領節度諸軍會陳宣帝薨頰以禮不伐喪奏請班
師

唐侯君集討高昌師至柳谷候騎言麴文泰死尅日將
葬國人咸集以輕騎襲之可有大利亞將姜行本等咸
以為然君集曰不可天子以高昌怠慢使吾恭行天誅
乃於墟墓之間以襲其葬非問罪之師也

李芄為河陽節度與馬燧等圍田悅於魏州悅將符璘
以精騎五百夜降芄開營以納之明日歸璘於招討使

李晟為中書令西平郡王妻卒詔以晟子愿依前為太子賓客前衛尉少卿付音為韶王傳居喪既大祥而除官晟以二子未禫訪於諸相趙退翁陸贄謂曰故事有大祥服闋授官者終禫而後朝請晟奏行之

李自良為河東軍都將從節度使馬燧入朝燧罷兵權德宗欲以自良代燧自良懇辭事燧久不欲代為軍帥物議多之

李愬為唐鄧節度使初平蔡州裴度先遣宣慰副使馬

總入蔡州安諭軍衆明日度建彰義軍節擁降卒萬餘
人次入焉愬具橐韉候度馬首度將避之愬曰淮西阻
命五十年一方之人不識上下等威之分久矣請公因
以示之度以宰相禮受愬迎謁衆皆聳觀

王鏐拜兵部尚書充淮南節度副大使時節度使杜佑
屢請代鏐始見佑以趨拜悅佑退坐司馬廳事數日詔
追佑以鏐代之

曹華為義成節度使華雖出自戎行而動必中禮尤重

士大夫未嘗以富貴驕人

柳公綽為山南東道節度使牛僧孺罷相鎮江夏公綽具戎容於郵舍候之軍吏白以漢上地高於鄂禮太過公綽曰竒章纔離台席方鎮重宰相是尊朝廷也竟以戎容見

梁謝彥章官至許州節度使將畧之外好優禮儒士與晉人對軍於河上常褻衣博帶動皆由禮或臨敵御衆則肅然有上將之威

劉鄩初為青州王師範行軍司馬昭宗幸鳳翔太祖率
西鎮之師奉迎於岐下師範乘虛襲取太祖管內州郡
令鄩以偏師陷兗州太祖命大將葛從周攻之師範兵
力漸窘從周以禍福諭鄩俾之革面鄩報曰侯青州本
使歸降即以城池還納師範告降從周即出城聽命鄩
既降從周具行裝服馬請鄩歸大梁鄩曰未受梁王捨
釋之旨乘肥衣裘非敢聞命即素服跨驢而發及將謁
見太祖令賜冠帶鄩曰纍囚負罪請就繫而入太祖不


許及見慰撫移時且飲之酒郭以量小告太祖曰取充
州量何大耶尋授元從都押牙

後唐馬全節始為鄴都留守以元城是桑梓之邑衣白
襪詣縣庭謁拜縣令沈邁遠巡避之不敢當禮全節
曰父母之鄉自合致敬勿讓之也州里咸以為榮

晉史翰為義成軍節度使性剛毅有沉謀御軍嚴整而
推恩信於士伍接下以禮與部曲語未嘗稱名

周英為成德軍節度使性沉厚謙恭有禮雖在金草之際

接對賓客亦未嘗造次將帥之中如者鮮矣



欽定四庫全書



卷三百八十八

三

冊府元龜卷三百八十八